

## तिमोथीयात पावलं च्वःगु निगूगु पौ म्हसीका

पावलं थ्व निगूगु पौ तिमोथीयात थः ल्याय्म्हम्ह पासा व थःत ग्वाहालि याइम्ह मन्ऱ्या कथं च्वःगु दु। उब्लय् तिमोथी एफिससय् च्वंम्ह मण्डलीयाम्ह छम्ह मू नायः खः। पौया मू खँ सह यायेगु खः। पावलं तिमोथीयात साहस बियाः न्ह्याथें ज्याःगु दुःखकष्ट व विरोध जूसां येशू ख्रीष्टयागु साक्षी बीगु, धात्थेंगु भिंगु खँ व पुलांगु नियम मानय् यानाः स्यनेकने यायेगु सल्लाह बियातःगु दु। थ्व पौलय् तिमोथीयात फयां फतले याकनं रोमय् वयेत इनाप यानातःगु दु। पावलं तिमोथीयात ल्वापु जक पिहांवइगु म्वाःमदुगु जवाःसवाः याना जुइपिनाप बुला जुइ मते धकाः नं ख्याच्चः बियातःगु दु। च्वय्च्वंगु खँत फुक्कं पावलं थःत हे जूगु खँया दसु बियाः तिमोथीयात लुमंके ब्यूगु खः। न्हूगु नियमय् दुगु पावलया पौत मध्ये थ्व पौ दकलय् लिपा च्वःगु खः। उब्लय् पावल रोमया जेलय् थःत मृत्यु दण्ड बीगु ई पिवाः च्वंगु खः।

थ्व पौ पावलं ईस्वी सम्बत ६४-६५ सालय् च्वःगु खः।

धलः पौ

न्ह्यारखँ १:१-२

प्रार्थना व अती १:३-२:१३

सल्लाह व ख्याच्चः २:१४-४:५

पावलयात थःत जूगु खँ ४:६-१८

क्वचाय्कूगु ४:१९-२२

## २ तिमोथी

पावलपाखें ज्वजलपा

1 ख्रीष्ट येशूयात विश्वास याक्वसित जीवन बी धकाः धयादीगुलि परमेश्वरं वय्कःयाम्ह प्रेरित यानादीम्ह पावलपाखें

2 जि यःम्ह काय् तिमोथीयात\* थ्व पौ च्वयाच्चना। इी परमेश्वर बाः व प्रभु ख्रीष्ट येशू छन्त दया माया यानाः शान्ति बियादीमा।\*

\* 1:2 १:२ तिमोथी ग्रीक भाषां तिमोथियसयात ☆ 1:2 १:२ प्रे १६:१

### सुभाय् व साहस

3 जिं जिमि तापाःबाज्यापिन्सं थें दुनुगलंनिसें परमेश्वरयागु ज्या यानाच्चनागु दु। प्रार्थना यायेबलय् जिं छन्त लुमंकाः चान्हिं परमेश्वरयात सुभाय् बियाच्चनागु दु।

4 छंगु मिखाय् जाया वःगु ख्वबि लुमंकाः जि छन्त नापलाः वये मास्ति वइगु। छन्त नापलाये खंसा जिगु मन च्वनी।

5 छं यचुगु नुगलं विश्वास याःगु जि अज्जं लुमनि। छिमि बज्ये लोइस व मां युनिसं नं अथे हे यचुगु नुगलं विश्वास याःगु खः। छं अज्ज नं उकथं हे यचुगु नुगलं विश्वास यानाच्चंगु दइ धकाः जितः विश्वास दु।✧

6 अयजूगुलि जिं छन्त हानं लुमंका च्वना – जिं छंगु छेनय् ल्हाः तयाबलय् परमेश्वरं बियादीगु वरदानयात छं बांलाक छ्यला च्वं।

7 परमेश्वरं झीत भयया आत्मा मखु, बरु झीत शक्ति, माया व थःत कःघाये फइगु आत्मा बियादीगु दु।

8 उकिं झी प्रभुयागु भिंगु खँ न्यंका जुइत लज्या चाये मते, अले जितः कुनातःगुलिइ नं लज्या चाये मते, बरु परमेश्वरयागु शक्तिइ भरोसा तयाः छं नं जिं थें तुं भिंगु खँयागु निति दुःखसिया जु।

9 थ्व हे परमेश्वरं झीत बचय् यानाः वय्कःया मनूत यायेत सःतादिल। झीसं यानागु धर्मकर्म यानाः मखु, बरु वय्कलं हे दया माया यानाः झीत बचय् यानादीगु खः। सृष्टि जुइ न्ह्यः हे ख्रीष्ट येशू झीत थ्व दया माया बियादीगु खः।

10 झीत मुक्ति बियादीमह ख्रीष्ट येशू झायादी धुंकाः तिनि थ्व बांलाक सीदत। वय्कलं मृत्युयात त्याकाः भिंगु खँ न्यंक्वसित अनन्त जीवन बियादिल।

11 थ्व हे भिंगु खँ न्यंकेत व स्यनेत जितः प्रेरित दयकादीगु खः।✧

12 थ्व हे ज्यायागु निति जिं थथे दुःखसिया च्वनागु खः। थ्व ज्या यानाः जि लज्यामचाया छायेधाःसा जिं सुयात विश्वास यानाच्चनागु दु व बांलाक स्यु। अले प्रभुयात जिं लःल्हाना बियागु फुक्क वय्कलं हानं लिहां झाया मदितले बांलाक बचय् यानातयादी।

13 ख्रीष्ट येशू झीत क्यनादीगु विश्वास व माया थें छं नं जिं धयागु फुक्क खँ याना क्यं।

14 झीगु दुने च्वनादीमह पवित्र आत्मायागु ग्वाहालि छन्त लःल्हाना बियातःगु सत्य खँयात बांलाक नुगलय् तयाति।

15 एशियाय् च्वंपि फुक्कसिनं जितः त्वःतावन धकाः ला छं सि हे स्यू। फुगेल्स व हेर्मेगेनसं तं जितः त्वःतावन।

16 ओनेसिफरसया जहानपिन्त परमेश्वरं दया यानादीमा, छायाधाःसा वं जितः यक्व यक्व हे साहस ब्यूगु दु। जितः झ्यालखानाय् कुनातल धकाः व लज्या मचाः।

17 रोमय् नं वं जितः मान्तुमालाः लुइकल।

18 एफिससय् दुबलय् नं वं जितः गुलि ग्वाहालि यात धयागु खँ ला छं नं बांलाक हे स्यू। प्रभु झायादीबलय् वयात दया माया यानादीमा।

## 2

भिंगु ज्या याइम्ह जुयाः क्यँ

1 अयजूगुलि जि यःम्ह काय्, ख्रीष्ट येशू बियादीगु दया मायां बल्लाका च्वँ।

2 यक्व मनूतयगु न्ह्यःने जिं नवानागु खँ छं नं मेपिं स्यनेकने यायेफुपिं विश्वास याये बहःपिन्त स्यना ब्यु।

3 ख्रीष्ट येशूयाम्ह भिंम्ह सिपाइँ जुयाः छं नं जि नाप दुःखकष्ट फ।

4 सुं नं सिपाइँ मेमेगु ज्याय् तक्यनाच्वनी मखु, बरु थः सेनापतियात लय्तायकेत जक स्वयाच्वनी।

5 नियमय् च्वनाः म्हितीम्ह मनुखं जक सिरपाः काये फइ।

6 हिचःति हायकाः बुँज्या याइम्हयसिनं हे दकलय् न्हापालाक लये खनी।

7 जिं धयागु खँ थुइकेगु कुतः या, छायाधाःसा प्रभुं हे छन्त थुइके फयकादी।

8 दाऊदया सन्तान, सिनाः म्वानावःम्ह येशू ख्रीष्टयात लुमंकी। जिं न्यंकागु भिंगु खँ थ्व हे खः।

9 थ्व हे भिंगु खँ न्यंकाः जिं थथे अपराधीयात थें नेवलं चिकाः च्वनेमाली। तर परमेश्वरयागु वचनयात सुनानं चिनातये फइ मखु।

10 अयजूगुलि परमेश्वरं ल्ययातःपिं मनूतयगु निति जिं न्ह्यागुं सह याये फु। अले इपिं ख्रीष्ट येशू बियादीगु सदां दइगु मुक्ति कयाः तःधने फयेमा।

11 थथे धयातःगु धात्थें खः –

“वय्कः नाप सीसा

वय्कः नाप हे म्वाये दइ।

12 झीसं सहयाना च्वंसा

वय्कः नाप राज्य याये खनी।

झीसं वयकःयात त्वःतूसा  
वयकलं नं झीत त्वःतादी।☆

13 झीपिं विश्वासी मजूसं  
वयकः विश्वासी हे जुयाच्चनी,  
छाय्धाःसा वयकलं थःम्हं  
थःत विश्वास यायेगु त्वःते फइ मखु।”

परमेश्वरपाखें ल्यःम्ह ज्याकःमि

14 परमेश्वरया नामय इमित थ्व खँय् ख्याच्चः ब्यु। म्वाःमदुगु खँय् ल्वाना जुइ मते, थुकि इमित हे स्यंकी।

15 परमेश्वरयागु सत्य वचनयात खःकथं छ्यलेगु या। ज्या यायेत लज्या चाये म्वाः। अले परमेश्वरया विश्वास याये बहःम्ह मनु जुइत कुतः या।

16 म्वाःमदुगु खँय् सुनाप हाः जुइ मते, छाय्धाःसा थथे हाला जुइपि मनुत परमेश्वर नाप झन झन तापानावनी।

17 इमिसं स्यनीगु खँ ध्वगिनाः नवइगु घाःथें न्यनावनी। थुपि मध्ये हुमेनियस व फिलेतस नं खः।

18 इपि सत्ययागु लँपुं चिलावने धुंकल। इमिसं सीपि न्हापा हे म्वाना वये धुंकल, आः म्वाना वइ मखुत धकाः न्यंका जुयाः गुलिखय् विश्वासीतय्त स्यंकाबी धुंकल।

19 अयनं परमेश्वरं स्वनादीगु जग गुबलें दुनावनी मखु। अले थ्व जगय् थथे च्वयातःगु दु – “प्रभुया मनूयात प्रभुं म्हस्यू।” अले “प्रभुयागु नां कयाः जूपिंसं मभिंगु ज्या याये मज्यू।” ☆

20 ततःधंपिनिगु छँय् लँ, वहःयागु थलबल जक मखु, चायागु व सिँयागु थलबल नं दयाच्चनी। गुगुं थलबल भ्वय्बलय् जक छ्यली, गुगुं थलबल मेबलय् छ्यली।

21 अयज्गुलि सुनां थःत थज्याःगु मभिंगु ज्याखं तापाक तया तइ, व मनु तःजिगु थलबल थें जुइ। वं थःम्हं थःत श्दु यानाः थः मालिकयागु ज्याय् न्हाबलें न्हाचिला च्वने फइ।

22 ल्याय्म्ह इलय् मभिंगु मतिइ वइ, उकि थज्याःगुलि तापाक च्वँ। बरु यचुगु नुगलं प्रभुयात मानय् याइपिलिसे जुयाः धर्मी जुइगु, विश्वास यायेगु, माया यायेगु व मिलय्चलय् जुयाच्चनेगु या।

23 म्वाःमदुगु व थःमहं मस्यूगु खँय् जवाःसवाः याना जुइ मते। थुकि ल्वापु जक पिहां वइ धकाः ला छं सि हे स्यू।

24 प्रभुया च्यः जुयाः सुंनाप ल्वाः जुइ मज्यु, बरु फुक्कसितं माया याइम्ह, बांलाक स्यनेकने याये फुम्ह, न्ह्यागु खं सह याये फुम्ह,

25 अले शत्रुयात नं क्वमिलु जुयाः थुइका बीम्ह जुइमाः। सके परमेश्वरं इमिगु नुगः हे हिलाः सत्य खँयात थुइके फयेकादी ला?

26 थुकथं वाः चायेकाः इपिं शैतानयागु ल्हातं बिस्सुं वये फइ, छायाधाःसा शैतानं इमित च्यः यानातःगु दु।

### 3

#### संसार फुनावनीगुया चिं

1 संसार फुनावनीगु इलय् तसकं दुःख जुइ धकाः सीकाति।

2 अबल्लय्यापिं मनूत थःत जक भिका जुइपिं, धिबायागु लोभ यानाजुइपिं, तःधंछुया जुइपिं, घमण्ड यानाजुइपिं, कर्पिन्त क्वहंका जुइपिं, मांबौयागु खँ मन्यनीपिं, गुण मस्यूपिं, परमेश्वरयात वास्ता मयाःपिं,

3 दया माया याये मसःपिं, क्षमा याइमखुपिं, मेपिन्त मभिकाः खँ ल्हानाजुइपिं, थःत कःघाये मफुपिं, नुगः छाःपिं, भिंगु खँ मययकीपिं,

4 मुले तयाः गः कीपिं, थः यःथें सना जुइपिं, जि हे खः धयाजुइपिं, परमेश्वरयात ययकेगु स्वयाः मोजमज्जा जक याये ययकीपिं,

5 पिनें परमेश्वरयात मानय् यानाजुइपिं, दुनुगलं धाःसा वयकःयागु शक्तियात मानय् मयाइपिं जुइ। थुपिलिसे जुइ मते।

6 इपिं मध्ये गुलिसिनं ला छँय् छँय् वनाः पापं जाःपिं व पापयागु खँ मतिइ तया जुइपिं मिसातयत् ल्हातयत् काइ।

7 थ्व मिसातयसं स्यनाः सय्का कायेत यक्व स्वइ। अयनं सत्य छु खः धकाः गुब्बसं सीके फइ मखु।

8 यान्नेस व याम्ब्रेसं मोशायात मभिका जू थें इमिसं नं सत्य खँयात मभिका जुइ। इमिगु बुद्धि स्यने धुंकल, अले इमिके विश्वास हे मदये धुंकल।☆

9 इपिं ताः च्वनी मखु, छायाधाःसा यान्नेस व याम्ब्रेसयागु थें इमिगु मूर्ख ज्या नं मनूतयसं सीकी।

पावलं तिमोथीयात ब्यूगु आज्ञा

10 छं जिं स्यनेकने यानागु, जिगु चालचलन, जिगु लक्ष्य, जिगु विश्वास, जिं गथे सह यानाच्चवना, जिं गुलि माया यानाच्चवना,

11 जितः गुलि दुःखकष्ट बिल, जिं गुलि सास्ती नये माल, एन्टिओखियाय्, आइकोनियनय् अले लुस्त्राय् जितः छु छु जुल धयागु फुक्कं छं स्यू। गज्याः गज्याःगु दुःखकष्ट जिं फये माल अले प्रभुं फुक्क दुःखकष्टं जितः बचय् याना तयादिल।✧

12 ख्रीष्ट येशूयात मानय् यानाः वय्कलं धाःथें चवनीपिन्त ला थथे दुःखकष्ट जू हे वइ।

13 मभिपिं व थगाहा मनूतयसं कर्पिन्त थगय् यायां थःत हे थगय् याका चवनेमाली। अले थुपिं झन झन स्यनावनी।

14 छं जक थ्व खँ सुयापाखें स्यना कयागु खः, व सीकाः थःमहं सय्कागु व विश्वास यानागु खँय् जुयाच्चँ।

15 मचानिसें हे छं धर्मशास्त्रयागु खँ सीकातःगु दु। थुकिं हे छन्त ख्रीष्ट येशूयात विश्वास यानाः दइगु मुक्तियागु खँ थुइके फयका बी।

16 धर्मशास्त्रयागु फुक्क खँ परमेश्वरया प्रेरणां च्वःगु खः, थुपिं स्यनेकने यायेत, न्वायेत, ट्रुंगु भिकेत व खःकथं म्वायेत तिबः बी।

17 परमेश्वरया मनूतयसं न्ह्याथें ज्याःगु भिंगु ज्याखँ नं याये फयेमा धकाः धर्मशास्त्र बियातःगु खः।

## 4

भिंगु खँ न्यकेगु

1 सी धुंकूपिं व म्वानाच्चपिं फुक्कसितं न्याय यानादीमह ख्रीष्ट येशू व परमेश्वरया नामं जिं छन्त धयाच्चवना — वय्कलं हानं ज्ञायाः राज्य यानादी तिनिगुलि

2 परमेश्वरयागु वचन न्यंकि। भिंगु इलय् नं मभिगु इलय् नं न्यंकि, न्ह्यागु जूसां सह यानाः मनूतयत्त इमिगु दोष क्यनाः स्यनेकने या, ब्वःब्यु, अले साहस नं ब्यु।

3 भिंगु खँ धाल धाःसा सह हे मयाइगु ई नं वइतिनि। इमिसं थःमहं मनं तुं थें ज्याःगु खँ स्यनेकने याइपिं गुरु तइ, अले थःत यःयःगु जक खँ न्यना चवनी।

4 इमिसं सत्य खँ न्यनी मखु। मनय् वः थें कनीगु बाखं जक न्यने यय्की।

5 छं जक न्ह्यागु जूसां नुगः क्वात्तुकाः च्वँ। दुःख सी माःसां स्यू। भिंगु खँ न्यंकेगु याना च्वँ। थःत बियातःगु ज्या पूर्वकि।

6 छायाःसा जिं ला थःत हे पाये धुन। जिगु ला सीगु ई नं वये धुंकल।

7 जिं यायेमाःगु बांलाक याये धुन। जिं ब्वाँय् वने गाके धुन। अथेसां जिं जिगु विश्वासयात बल्लाक तया तयागु दु।

8 आः ला धर्मी ठहरय् जूपिन्त धकाः तयातःगु श्रीपेच जक काये ल्यंदनि, गुगु सुयागु ख्वाः मस्वसे न्याय यानादीम्ह प्रभुं झायाः पुइकादी। जितः जक मखु, वय्कः झाइगु यःपिं फुक्कसितं वय्कलं व श्रीपेच पुइकादी।

9 छं याकनं हे जिथाय् वयेगु स्व।

10 डेमास थ्व संसारयात माया यानाः जितः त्वःताः थेसलोनिकाय् वने धुंकल। क्रेसेन्स गलातियाय् वन, तीतस दलमातियाय् वन।\*

11 लुका जक जि नाप दु। मर्कूसयात मालाः छनापं ब्वना हजि। वं जिगु ज्याय् यक्व हे ग्वाहालि बी।\*

12 तुखिकसयात जिं एफिससय् छवयागु दु।\*

13 त्रोआसय् च्वंम्ह कार्पसयाथाय् जिं त्वःता थकागु गा ज्वना वा। अन त्वःता थकागु सफू व छेंगुलिइ च्वयातःगु सफू नं लुमंक ज्वनाः वा।\*

14 अलेक्जेन्डर सिजःकःमिनं जितः तसकं बांमलाकल। प्रभुं वयात यायेमाःगु यानादी।\*

15 व खनाः छं नं होश यानाच्वँ, छायाःसा वं झीगु भिंगु खँयात तसकं मभिंकाः खँ ल्हानाच्वंगु दु।

16 दकलय् न्हापां जिगु मुद्दा जबलय् जिगु पंलिनाः सुनानं नमवाः। फुक्कसिनं जितः त्वःतल। इमिसं थुकियागु ल्याःचाः प्रभुयात बी म्वाःलेमा।

17 उबलय् प्रभुं हे जि नाप झायाः जितः बांलाक भिंगु खँ न्यंकेत शक्ति बियादिल। अयजूगुलि जि यहूदीमखुपिन्त भिंगु खँ न्यंके फत। थुकथं वय्कलं जितः सिहयागु म्हुतुं बचय् यानादिल।

18 प्रभुं हे जितः फुक्क कथंया मभिंगु खं बचय् यानादी। अले थःगु स्वर्गयागु राज्यय् यंकेत वय्कलं जितः बचय् यानादी। वय्कः सदां सदां तःधना च्वनेमा। आमेन।

\* 4:10 ४:१० कल ४:१४; फिले २४; २ कोर ८:२३; गला २:३; तीत १:४ \* 4:11 ४:११ कल ४:१४; फिले २४; प्रे १२:१२,२५; १३:१३; २५:३७-३९; कल ४:१० \* 4:12 ४:१२ प्रे २०:४; एफि ६:२१-२२; कल ४:७-८ \* 4:13 ४:१३ प्रे २०:६ \* 4:14 ४:१४ १ तिमो १:२७; भज ६:१२; रोम २:६

लिपांगु ज्वजलपा

19 प्रिस्किला व अकिलास, अले ओनेसिफरसया जहानपि सकसितं जिगु ज्वजलपा धयाब्बु।☆

20 इरास्तस कोरिन्थय् तुं च्वन, त्रोफिमसयात धा:सा उसाँय् मदुगुलि मिलेटसय् तुं त्व:ता थका।☆

21 चिकुला न्ह्यः हे जिथाय् वयेगु कुतः या। युबुलस, पुडेस, लिनस, क्लौडिया व थनच्वंपिं किजापिं सकसिनं ज्वजलपा धयाहःगु दु।

22 प्रभु छंगु नुगलय् दीमा। परमेश्वरं छिमित दया माया यानादीमा।



**Newar**  
**Newar: Newar (Bible)**

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

---

PDF generated using Haiola and XeLaTeX on 16 May 2025 from source files  
dated 17 May 2025

838cc630-4ccf-5055-be45-10a98a141cc7